

HUGHES, EDWARD ('Y Dryw '; 1772 - 1850), eisteddfodwr

Enw: Edward Hughes
Ffugenw: Y Dryw
Dyddiad geni: 1772
Dyddiad marw: 1850
Rhiant: Benjamin Hughes
Rhyw: Gwryw
Galwedigaeth: eisteddfodwr
Maes gweithgaredd: Eisteddfod; Barddoniaeth
Awdur: Robert William Hughes

Ganwyd yn Nannerch (bedyddiwyd 9 Gorffennaf), mab Benjamin Hughes, Walgoch, Nannerch. Addysgwyd ef yn S. Alban's Hall, ac ymaelododd yng Ngholeg Iesu, Rhydychen, yn 1794; B.A., 1797; M.A., 1800. Bu'n gaplan yn y fyddin am beth amser, a hefyd yn yr un swydd ar long ryfel yn yr ymgyrch anffodus i ynys Walcheren yn 1809. Bu'n rheithor Llanddulas o 1814 i 1818, a Bodfari o 1818 i 1850.

Dyfarnwyd ei awdl 'Elusengarwch' yn orau yn eisteddfod Dinbych, 1819, gan [Dr. William Owen Pughe](#), '[Bardd Nantglyn](#),' a '[Dewi Silin](#).' Cododd storm anarferol chwerw a barhaodd am amser maith ynghylch y dyfarniad hwn. Bernid gan feirdd a llenorion Cymru yn dra chyffredinol mai '[Dewi Wyn o Eifion](#)' a deilyngai y wobr. Etholwyd ef yn fardd Cymdeithas y Gwyneddigion, 1820-1, ac enillodd wobr Cymdeithas y Cymmrodorion, 1822, am ei gywydd 'Hu Gadarn.' Yn eisteddfod Dinbych, 1828, bu'n fuddugol eto ar 'Ymdrech Buddug yn erbyn y Rhufeiniaid' a hefyd ar yr awdl, 'Amaethyddiaeth,' dan feirniadaeth '[Gwallter Mechain](#),' '[Alun](#),' ac [Aneurin Owen](#). Bu'n gystadleuydd ar awdlau yn Wrecsam, 1820, Caernarfon, 1824, Rhosllanerchrugog, 1829, Bryn Eglwys yn lâl, 1830. Ceir amryw ddarnau byrion o'i waith yng ngwahanol gylchgronau a chasgliadau barddonol ei gyfnod. Bu farw 11 Ebrill 1850 ym Modfari.

Awdur

Y Parchedig Robert William Hughes, (1885 - 1954)

Ffynonellau

Alumni Oxonienses

Charles Ashton, *Hanes llenyddiaeth Gymreig o 1651 O.C. hyd 1850* (1893), 489, 568

Y Gwyllydydd, 1830, 160, 223

The Cambro-Briton, Ionawr, 1821, 232

Robert Williams, *Enwogion Cymru. A Biographical Dictionary of Eminent Welshmen* (1852)

Cofnodion Eisteddfod Dinbych, 1828

Cymru (O.M.E.), xvii, 244

D. R. Thomas, *A History of the Diocese of St. Asaph* (1874), ii, 7

Darllen Pellach

Erthygl Wicipedia: [Edward Hughes](#)

Dolenni Ychwanegol

Wikidata: [Q5343539](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchfrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng

Nghymru a thu hwnt.

Ewch i'n [tudalen codi arian](#) am ragor o wybodaeth.

